

NEAUTORIZIRANI TRANSKRIPT
NASTAVKA 29. HITNE SJEDNICE ZASTUPNIČKOG DOMA
PARLAMENTARNE SKUPŠTINE BOSNE I HERCEGOVINE
održanog 24.09.2025. godine, sa početkom u 12:30 sati

PREDSJEDATELJ
MARINKO ČAVARA

Uvažene dame i gospodo, kolegice i kolege, poštovani gosti nastavljamo 29. hitnu sjednicu Zastupničkog doma Parlamentarne skupštine BiH. Srdačno pozdravljam sve nazočne, posebno predsjedateljicu Vijeća ministara i glavnog tajnika, zamjenicu ministra za ljudska prava i sve nazočne u ovoj dvorani.

Odsutnost su opravdali zastupnici: Šerif Špago, Edin Ramić, Nermin Mandra, Vlatko Glavaš i gospodin Nihad Omerović i Obren Petrović, nije mi ovdje zapisano. Konstatiram da za sjednicu i pravovaljano odlučivanje imamo kvorum.

Jučer smo sukladno članku 74. stavak (3) Poslovnika odlučili da se daljnja rasprava o Prijedlogu zakona o Proračunu institucije BiH i međunarodnih obveza BiH za 2025. godinu, a predlagatelj je Predsjedništvo BiH, sa zahtjevom za razmatranje po hitnom postupku, u skladu sa člankom 133. Poslovnika, neće voditi zbog odsutnosti predlagatelja. Mi smo, evo Kolegij je zaključio jučer da danas damo još jednu šansu predlagateljima da dođe neko od ovlaštenih ... u ime predlagatelja ovlaštenih predstavnika. Koliko vidim meni se niko nije prijavio od ovlaštenih predlagatelja i meni će biti samo, da kažemo, sukladno Poslovniku i članku 74. zaključiti ovu sjednicu i zakazati.

Gospodine Magazinoviću je li rasprava ili poslovnička?

SAŠA MAGAZINOVIĆ
/nije uključen mikrofoni/
Poslovnička.

MARINKO ČAVARA

Molim Vas prijavite se onda ispravno da Vam mogu dati riječ.
Izvolite gospodine Magazinoviću.

SAŠA MAGAZINOVIĆ

Zahvaljujem Vam, predsjedavajući.

Sve ste činjenično tačno naveli s tim da smo juče vodili ovaj ovdje raspravu i također činjenično naveli da je rasprava o hitnom postupku okončana Vašim riječima – zaključujem raspravu nema više prijavljenih. Samo jučerašnje izjašnjavanje od toga hoćemo li nakon okončane rasprave otvoriti ili nećemo otvoriti raspravu je bilo pogrešno, ali evo ustanovili smo neko pravilo,

po meni pogrešno, da glasamo o stvarima koje su se već desile. Bez namjere da bilo kome glumim roditelje ili usmjeravam u bilo kojem pravcu i politički, kako će ko glasati nek glasa, ali mislim da prevelik teret Parlament uzima na sebe da nije krenuo ni u proces i bilo bi korisno da krenemo razgovarati o suštini, pa evo ako je većina protiv nek padne, znači, ako je većina za nek prođe, ako imaju amandmani nek se daju amandmani, ali malo smo prevelik teret preuzeli na sebe ničim izazvani da proces ne može ni da krene. Zato Vas pozivam, predsjedavajući, da još jednom se izjasnimo, evo ja tražim sad da se izjasnimo hoćemo li nastaviti ovu današnju sjednicu, odnosno ova, ovo, evo ne znam ni ja šta, bez prisustva predlagača da glasamo još jednom o tome.

Hvala.

MARINKO ČAVARA

Hvala ljepa.

Ispravak krivog navoda zastupnica Sanja Vulić. Izvolite.

SANJA VULIĆ

Hvala predsjedavajući.

Htjela sam zapravo ovaj povredu Poslovnika član 79. pod stavom ... gdje kaže – nepoštovanje, odnosno vrijeđanje poslanika i ostalih prisutnih, nepoštovanje predsjedavajućeg Doma itd. Želim samo reći da je ovo apsolutno vrijeđanje svih nas, koji ovdje sjedimo, od strane predlagača, u ovom slučaju dva člana Predsjedništva, i ukoliko se oni nisu udostojili da se ovdje pojave i da objasne šta su šarali, s kojim ciljem, kako, zašto su glumili doktore ekonomskih nauka i ne znam ni ja šta, šta je njihov krajnji cilj s ovim budžetom oni ni, njima nije do toga stalo, a nama treba da je stalo, e pa izvinite gospodo mislim da ne govorimo istim jezikom. Smatram da treba da uradimo upravo ovo što ste rekli, juče smo donijeli zaključak da nećemo raspravljati bez predlagača. Je li ovdje predlagač? Nije, nisu nevidljivi da ih ne primjećujemo, da ih ne uočavamo, njima nije do ovog stalo, njima nije stalo do budžeta i logično je da im nije stalo šta će im stati do budžeta krajem septembra 2025., a da govorimo o budžetu za 20205. Oni se poigravaju, hodaju po bijelom svijetu, svako gura svoju politiku, zastupa svoje narode kako oni smatraju ili jedan narod da treba, a ovdje sa nama koji smo birani od strane svojih građana da budemo njihov glas poigravaju se, dangubimo svoje vrijeme umjesto da smo na terenu i da smo dostupni onima kojima zaista trebamo mi ovdje raspravljamo o tome da li će se ovaj, ne znam ni kako se više zovu, pojaviti ili neće, hoće-neće, neće, nemamo mi o tome šta raspravljati zaključite sjednicu i hajdemo.

MARINKO ČAVARA

Ispravak krivog navoda Milorad Kojić. Izvolite.

MILORAD KOJIĆ

Zahvaljujem predsjedavajući.

Uvažene kolege, pa želim da krivi, ispravak krivog navoda se odnosi na diskusiju gospodina Magazinovića. Dakle, ne možemo danas da se izjašnjavamo ponovo o onome o čemu smo se juče izjasnili. Dakle, juče smo jasno rekli da se sjednica ne može održati dok ne dođe ovlašteni predlagač i pokušalo se, iako smo juče sugerisali, da se obezbijedi u roku od jednog dana da bude ovlašteni predlagač danas ovdje. Njega danas nema, dakle u tom slučaju jedino što možete

da konstatujete, a ne da ponovo glasamo, da nema ovlaštenog predlagaca, da se zaključuje ova hitna sjednica i kada se obezbijedi ovlašćeni predlagač da se zakaže sledeća hitna sjednica koja se odnosi, dakle, na sam budžet.

Hvala.

MARINKO ČAVARA

Kao informaciju Vama, znači mi smo uredno poslali pozive i Predsjedništvu i one koje su oni sukladno Zaključku 3 koje su nam dostavili, znači pozvali i na prethodnu sjednicu i na današnju sjednicu, a podsjetiću Vas oni su zadužili u točki 3, u Zaključku 3 – doktor Srđan Amidžić, ministar financija i trezora BiH, te Muhamed Hasanović zamjenik ministra financija i trezora BiH da u Parlamentarnoj skupštini u ime Predsjedništva BiH izvještavaju o Prijedlogu zakona o Proračunu institucija BiH i međunarodnih obveza BiH za 2025. godinu. Činjenica jeste da smo se mi juče izjasnili o ovom pitanju, ali smo zakazali danas sjednicu da im damo još jednu šansu da dođu, jer je proračun prvenstveno mi smatramo važan, ali trebao bi biti i svima oni koji su predlagači i oni koji su u ime predlagača.

Ja samo mogu napraviti kompromisno, ovaj, rješenje da pitam Zastupnički dom, jer vi odlučujete ne ja, ja mogu o domenu ovaj svoje, samo trenutak da završim misao kolegice molim Vas, nemojte s mjesta dobacivat možete se uvijek za poslovničku javiti, samo da završim misao, da pitam – da li zastupnici smatraju da se trebamo ponovo izjasniti o raspravi, nastavku rasprave bez predlagača? Ja vas molim ovo pitanje nije dostojno uređeno Poslovnikom, znači pitam, molim vas pripremite glasovanje. Znači, molim vas samo saslušajte me dobro, da li ćemo se ponovo izjašnjavati o tome, a ovo imate mogućnost da odlučite, znači da li ćemo se ponovo izjašnjavati da li ćemo raspravljati bez predstavnika predlagača. Ako se izjasnimo da nećemo raspravljati, ja ću, samo da vam kažem do kraja saslušajte, ja ću zaključit sjednicu i zakazat hitnu sjednicu 15. u 12:00 sati opet tema proračun. Ukoliko drugačije odlučite, ja ću dat na glasovanje da li ćemo raspravljati bez predlagača i onda opet kako Zastupnički dom odluči tako ćemo dalje postupiti. Ja ne znam kako drugačije izaći iz ove druge, iz ove situacije. Znači, molim vas glasovanje da li ćemo, sad, znači sad glasujemo da li ćemo glasovati da raspravljamo, nastavimo raspravu bez predlagača, samo to da izjasnimo se. Ima, of imamo dovoljno.

Povreda Poslovnika Safet Kešo. Izvolite.

SAFET KEŠO

Uvaženi predsjedavajući ovdje očigledno nije samo u pitanju povreda Poslovnika, mogle bi se komotno iskoristiti i mnogo teže riječi, ovo je njegov potpuni slom, znate, u to ime ja tražim pauzu u ime Kluba od 15 minuta.

_____(?)
/nije uključen mikrofoni/

SAFET KEŠO

Bez obzira, da bi smo znali kako ćemo glasati tražim pauzu od 15 minuta.

MARINKO ČAVARA

Kolega Kešo, možemo li saslušati ostale poslovničke pa da onda damo pauzu? Ako insistirate ja ću Vam dati odma pauzu po Poslovniku?

SAFET KEŠO

/nije uključen mikrofoni/

MARINKO ČAVARA

Da saslušamo i ostale, dobro.

Zastupnica Sanja Vulić, povreda Poslovnika. Izvolite.

SANJA VULIĆ

Uvaženi predsjedavajući, ja se u potpunosti slažem sa kolegom Kešom, ovo je cirkus, ovo nije kršenje Poslovnika, ovo je bacanje u korpu za smeće Poslovnika. Ja Vas ljudski molim sačuvajte svoj dignitet, ja razumijem Vašu potrebu da se Vi pokažete kao dobar predsjedavajući i sve ostalo, a shvatite Vi da ljude ne možete na nešto natjerati, ako ljudi ne žele da dođu kao predlagači, pa šta hoćemo ih sad gepekovati i dovući ovdje nazor, njih dvojicu, da oni objasne. Ja ne znam zašto je Vama stalo kad njima nije stalo, zašto Vi nas ovdje mučite i maltretirate, zašto izlazite iz okvira Poslovnika, pa zašto svoj dignitet narušavate, Vi ste jedan fini gospodin koji, kog svi mi uvažavamo, pa daj ostanite na nivou. Šta me briga što će se neko tamo uvrijediti što nismo raspravljali, jeste gospodo došli, niste. I podsjetiću Vas na početku da je Hasanović došao za ovom govornicom i rekao ovo nije provodivo i logično je što neće iz ministarstva da dođu, ljudi su se i javno i za ovom govornicom izjasnili ovo nije provodivo. Ko treba objasniti da li je provodivo? Oni koji su pisali, a ako ne znaju nek im Šmit, koji im je dao naredbu, da uputstva i nek ovdje dođu i nek to obrazlože. Nemojte nas ponižavati, nemojte sebe ponižavati, pa ovo je cirkus, ovo nije Poslovnik. Ajde što smo izašli iz svih okvira, ali nemojte Vi svoj dignitet da narušavate. Kome Vi ispunjavate želju, aj recite mi molim Vas, jeste Vi nekom nešto dužni?

MARINKO ČAVARA

Hvala kolegice na poslovničkoj, niste se pozvali na odredbu Poslovnika.

Ja samo želim naći rješenje i da o tome Dom odluči, a ne ja i članovi Kolegija. Znači, glasovati o tome da li ćemo se o nečemu izjasniti sasvim je pravo da se izjasnite i dajem vama da odlučite, a ne da ja odlučim.

Znači, povreda Poslovnika Nebojša Radmanović. Izvolite.

NEBOJŠA RADMANOVIĆ

Gospodine predsjedavajući, mi smo se već izjasnili o ovome i to svi znaju i nije slučajno ovoliko prijava za povredu Poslovnika, ovo je potpuno rušenje Poslovnika, ne smijemo to dozvoliti. Podsjećam Vas na ono što smo juče, više nas, govorili ovdje, a i na prošloj sjednici,

nemojte da sruše i ovaj Dom, svojim potezima na raznim nivoima vlasti se sami urušavaju i sad hoće i nas da uvuku u to blato, dajte da se izdignemo iznad toga i da radimo u skladu sa Poslovnikom i moram reći sa Ustavom. Nema predlagača, u Ustavu kaže da je predlagač Predsjedništvo, podrazumijeva se da oni ne mogu nama poslati papir nego da će neko objasniti u ime njih.

Imam prijedlog rješenja gospodine predsjedavajući, a mislim da će to svi prihvatiti, ajde neka Kolegij malo sam nešto radi mimo toga, evo gospođe predsjedavajuće Savjeta ministara, organizujte u narednih par dana razgovor Vi sa Predsjedništvom, predsjedavajuća Savjeta ministara, Kolegij i Predsjedništvo i nađite rješenje kako i predložite nam, al ne da u beznađu kažete hajmo ponovo glasati za ono što smo juče već izglasali ... Čemu, stvarno nije dostojno bilo kog čovjeka da ga ubjeđujemo da dva put treba glasati o istoj stvari, a ništa se nije promijenilo, dakle ništa. Glasali smo o tome jer nije bilo nikoga juče i sad hoćete opet da glasamo zato što nema nikog, dakle ne možemo to glasati i nećemo glasati oko toga, a Vama predlažem, evo rekao sam kako mislim da se može izaći iz ovoga problema do tog 15. kad Vi zakazujete sjednicu, al uradite neke konsultacije prije toga da nađemo rješenje. Svima je u interesu da dobijemo budžet, bez obzira što kasni deset mjeseci, svima je u interesu i građanima i zaposlenima i hoćemo da uradimo to, nikom nije stalo ovdje da bude odgovoran za to što neko nije dobio platu na vrijeme, ali mora se naći rješenje sa predlagačem, a predlagač nam je napravio vidjeli ste kakav prijedlog koji niko ne može ni obrazložiti, ne mogu ni iz Savjeta ministara, ni ministar, ni zamjenik ne mogu obrazložiti ono. Naravno, ne mogu ni članovi Predsjedništva, jer da mogu to bi drukčije već postupili. Dakle, pokušajte, evo moj prijedlog, nije zvanično niti ćemo oko toga glasati, vama da pokušate u konsultacijama do naredne sjednice, kad god je, i da je vi tada zakažete, vi tada se opredjeljujete kako ide dalje kao Kolegij.

Hvala.

MARINKO ČAVARA

Ali ja kolega Radmanović, ja se sve s Vama slažem osim da sam ja prekršio Poslovnik, znači na, dosljedno Poslovnik primjenjujem i zašto je problem da se neko izjasni da li želi raspravljati ili ne želi. Danas je

_____(?)
/nije uključen mikrofoni/

MARINKO ČAVARA

Ne morate s mjesta dobacivati, razumio sam ja šta ste Vi rekli, potpuno sam razumio, Vi smatrate jučer smo se izjasnili po jednoj točki, a danas je drugi dan. Znači, deset puta ponovimo nekad u istom trenutku u jednoj minuti glasovanje, ali to ćemo razjasniti.

Jasmin Emrić, povreda Poslovnika. Izvolite.

JASMIN EMRIĆ

Zahvaljujem predsjedavajući.

U članu 104. Poslovnika, ovog uvaženog Doma, stav (2) utvrđeno je sljedeće – Predlagač zakona ili ovlašteni predstavnik predlagača obavezan je prisustvovati svim raspravama o prijedlogu zakona dok traje zakonodavna procedura.

Dakle, zakonodavna procedura o Budžetu institucija BiH za 2025. godinu je u toku i predstavnik, predlagač ili predstavnik predlagača je obavezan prisustvovati dok traje zakonodavna procedura, to je član 104. kojeg sam pročitao. Dakle, suvišno je i nije u skladu sa Poslovníkom da se ovaj Dom izjašnjava o tome da li ćemo se mi izjašnjavati o tome da li ćemo nastaviti raspravu bez prisutnosti predlagača. Dakle, mi se trebamo, uvaženi predsjedavajući, izjasniti o prijedlogu kolege Magazinovića, odnosno o njegovom zahtjevu da se ovaj Dom izjasni o tome da li ćemo nastaviti raspravu bez predlagača, bez ovog prethodnog Vašeg prijedloga koji ste Vi predložili, zbog toga što je to suvišno i nije u skladu sa Poslovníkom. Također, potpuno je pogrešno prebacivati odgovornost zbog neprisustva predstavnika predlagača Predsjedništvu BiH, zbog toga što, Vi ste to, predsjedavajući, već iznijeli, zbog toga što je Predsjedništvo Zaključkom od 19. augusta pod tačkom 3. ovlastilo da ovlašteni predlagač bude ministar financija ili zamjenik ministra financija. Zašto nema ministra financija, zašto nema zamjenika ministra financija, to je pitanje za raspravu. I sve ovo što se dešava i jučer i danas cijeli ovaj igrokaz, cijela ova farsa je zbog toga što ministar financija ne vrši svoju osnovnu zadaću, što on ne uvažava ovaj Dom, što ne uvažava ni ovlaštenje od strane Predsjedništva BiH. Dakle, ministar financija ima svoje obaveze, svidale se njemu ili ne svidale, kao što i ja kao zastupnik imam svoje obaveze bez obzira što neke odluke ne podržavam ili podržavam ili ovisno o našem parlamentarnom radu. Dakle, ovo je nedopustiv odnos ministra financija, zamjenika ministra financija, koji imaju obavezu da su ovdje. Uvažena predsjedavajuća Vijeća ministara je danas ovdje kako bi ublažila ovu apsurdnu situaciju, ali nažalost nema onoga koga je ovlastilo Predsjedništvo i danas mi pravimo vratolomije od Poslovnika kako bi razriješili ovu situaciju, a rješenja nema zbog ovakvih političkih odnosa i ovakvih političkih opstrukcija, a budžet treba svima, pogotovo onima koji trpe, to su uposlenici institucija BiH koji trpe i imaju štetne posljedice zbog toga što smo mi njima izglasali Zakon o izmjenama i dopunama Zakona o plaćama, a ne damo im da ostvare to pravo zbog ovih vratolomija i neodgovornosti onih koji treba da dođu u ovaj Dom i da ako ništa samo sjede.

MARINKO ČAVARA

Vrijeme kolega.

JASMIN EMRIĆ

Hvala.

MARINKO ČAVARA

Hvala.

Milorad Kojić, ispravka krivog navoda. Izvolite.

MILORAD KOJIĆ

Zahvaljujem predsjedavajući.

Prvo, gospodine Emriću, da li Vi možete da izgovorite da volite SNSD? Možete li Vi izgovoriti sa za govornicom da volite SNSD? Vjerovatno

MARINKO ČAVARA

Molim vas nemojte se obraćati osobno

MILORAD KOJIĆ

Ne, ne, ne

MARINKO ČAVARA

diskutirajte.

MILORAD KOJIĆ

ovo je konstatacija. Dakle, naravno da to ne možete izgovoriti jer ne volite i to je normalno, imate svoj neki politički put. Da li može ministar finansija doći i reći da je dobar budžet, a on nije dobar, kako onda ministar finansija da brani budžet za koji je i njegov zamjenik rekao da je neprovodiv i nemojte prebacivati lopticu na ministra finansija koji nije učestvovao, niti Savjet ministara, koji nije učestvovao nijednog trenutka u kreiranju ovog budžeta i sad nama treba da izađe neko ovdje ispred Ministarstva finansija i da brani nešto sa čim se ne slaže, a tu tek pravimo lakrdiju, oni koji su ga pisali i koji su predložili trebaju da dođu i da brane ono što su oni napisali. Zato sam i imao ovu konstataciju da li možete reći da volite SNSD, ne možete, tako ne mogu ni oni.

Dakle, što se tiče ovog glasanja danas, predsjedavajući, mi danas nemamo trideset i koju već sledeću hitnu sjednicu, već imamo nastavak jučerašnje hitne sjednice, dakle mi smo se juče izjasnili da bez ovlaštenog predlagača nećemo ulaziti u proceduru rasprave o samom Prijedlogu zakona o Budžetu. Danas što je novi dan nije nova sjednica, znači onda smo mogli i jučer poslije onog glasanja napraviti pauzu pa opet da glasamo hoćemo ili nećemo. Dakle, mi smo jasno odlučili ovdje svi da nećemo da raspravljamo dok ne dođe ovlašćeni predlagač, danas nema potrebe da se izjašnjavamo jer se radi o nastavku hitne sjednice, a ne o novoj hitnoj sjednici.

MARINKO ČAVARA

Dobro, ispravak krivog navoda Miroslav Vujičić. Izvolite.

MIROSLAV VUJIČIĆ

Pa evo samo par pojašnjenja. Dakle, ministar finansija je predložio budžet koji je prekrojen u Predsjedništvu kako može čovjek doći da brani nešto što nije predložilo Ministarstvo finansija i što nije njegov prijedlog nego je prijedlog dva člana Predsjedništva, dakle oni su, na njima je odgovornost, da je pred nama budžet koji je predložio ministar finansija Srđan Amidžić vjerovatno bi on i dobio podršku. Međutim, članovi Predsjedništva su imali volju i želju da potpuno besmisleno prekroje taj isti budžet i zato smo došli u ovu situaciju. Nema razloga da se pravdamo,

odnosno da se neki pravdaju i da se pozivaju na povećanje radnika koji imaju najmanje plate. Odgovornost zašto radnici u službama imaju najmanje plate je isključivo na dva člana Predsjedništva koji su prekrojili budžet koji je ministarstvo dostavilo. Dakle, na njima je odgovornost i oni trebaju doći ovdje da nam, je li da nam obrazlože ovaj budžet koji je neprovodiv. Vidjeli ste na kraju krajeva na prethodnoj sjednici i oda zamjenika ministra finansija da je nemoguće provesti ovakav budžet kao što je dostavljen u prijedlogu, dakle, potpuno je jasno.

Podržavam ovaj prijedlog gospodina Radmanovića da članovi Kolegija obave konsultacije i sa Predsjedništvom i sa predsjedavajućom Savjeta ministara i da se izađe iz ovog, ovog, upravo tako, iz ovog vrzinog kola koje su izazvali članovi Predsjedništva.

Hvala.

MARINKO ČAVARA

Ispravak krivog navoda, Jasmin Ermić. Izvolite.

JASMIN EMRIĆ

Kolega Kojiću, Vaša konstrukcija o vođenju SNSD-a je besmislena u ovom kontekstu rasprave. Ali ono što je činjenica to je da je Predsjedništvo ovlastilo ministra financija da bude ispred predlagača kada se raspravlja o Budžetu institucija BiH za 2025. godinu. Ministar financija je mogao doći i nas upoznati sa tim da se on ne slaže sa predloženim budžetom, da je Vijeće ministara uputilo budžet Predsjedništvu, da je Predsjedništvo izmijenilo, može dati svoj sud ili nije mogao reći ništa, ali je obavezan da prisustvuje kako ne bi mi gubili vrijeme. Dva dana mi ovdje gubimo vrijeme samo zbog toga što ministar financija ili zamjenik ministra financija nisu se udostojili da dođu i da sjede tu, a uvažena predsjedavajuća Vijeća ministara, koja nije imala obavezu danas da dođe, ona je tu prisutna. Dakle, ovdje se radi o odgovornosti i moramo postaviti i pitanje odgovornosti kod samog kršenja budžetskog kalendara kod predlaganja budžeta – šta je čekalo Ministarstvo financija sa budžetom, zašto nije pravovremeno pokrenulo proceduru usvajanja budžeta itd.? I ranije smo o tome diskutirali i ja sam predlagao da Tužilaštvo BiH ispita da li ima odgovornosti kada se krši budžetski kalendar, naravno tu nema rezultata. Dakle, opća je jedna neodgovornost, politika se pretvorila u samovolju i izživljavanje i mi svi skupa imamo posljedice tog neodgovornog rada i čina.

Hvala.

MARINKO ČAVARA

Zastupnik Zlatan Begić, ispravak krivog navoda. Izvolite.

ZLATAN BEGIĆ

Dame i gospodo, poštovani predstavnici administrativno-tehničkih službi Parlamentarne skupštine, Vijeća ministra, poštovani predstavnici medija, poštovani gosti, poštovana predsjedavajuća i predsjedavajući, članovi Kolegija, sve vas lijepo pozdravljam.

Pravo da vam kažem mi iz opozicije evo na neki način se uzdržavamo od rasprava, vodeći se principom in favorem negoti u korist određenog odnosa, odnosno dovršavanja procedure, vjerujte mi dali ste nam toliko materijala da vas tako izbušimo kao vladajuću većinu ovdje da

napravimo cirkus od vas ovdje. Ja sam čak pomišljao da ponesem i suncobran ovdje sa postoljem i da ga lijepo postavim i da stavim gumenu patku na sto, da stavim naočare one XXXXL veličine i da sjedim ovdje da vam pokažem šta ste napravili od Parlamenta. Mislim da je to velika sramota, pa i ovu raspravu koju vodimo. Postavlja se pitanje po kojem poslovničkom osnovu mi vodimo, ljudi, ovu raspravu? Javljam se po nekoliko puta, više ne vrijede ni ograničenja, hiljadu ispravaka krivih navoda – kojim putem idemo? Dakle, maksimalno smo se uzdržavali i vodeći se, ponavljam, principom in favorem negotii, odnosno da se ova procedura dovrši da se perfektuira, da se taj budžet, ako je moguće, donese u interesu svih nas, pa u septembru u septembru, to je slika svih nas. A sad kad sam se već javio

MARINKO ČAVARA

Vrijeme, vrijeme pošto insistirate ...

ZLATAN BEGIĆ

doista moram da ukažem na neke stvari

MARINKO ČAVARA

na poštivanju Poslovnika isteklo Vam je vrijeme.

ZLATAN BEGIĆ

Molim Vas, ako mogu samo 15 sekundi?

MARINKO ČAVARA

Onda ću morati dati i ostalima, a onda ulazimo u

ZLATAN BEGIĆ

15 sekundi, već, već smo u raspravi koja nema nikakve, 15 sekundi mogao sam završiti.

Dvanaest sati ranije prije nego što je rekao da je budžet neprovodiv zamjenik ministra je rekao da je to najbolji budžet na svijetu. Molimo vas na ulaske u parlamente raznih zemalja pišu određene velike misli, ja se plašim da ovdje možemo izgravirati – hoćemo li glasati da ne glasamo. To sam čuo jučer, to sam čuo danas.

Molim Vas da se vratite u granice Poslovnika, izvinjavam se što sam prekršio ovaj odredbu o vremenu i nadam se da ćemo ući u neki normalan tok, gledaju nas građani.

Hvala lijepa.

MARINKO ČAVARA

Kolega Begić, Vi se pozivate na Poslovnik, prvo ste vršili ispravak krivog navoda nepoznatog zastupnika, a onda ste prekršili vrijeme, tako da kontradiktorna je bila Vaša.

Vidite, više nema prijavljenih, gospodin Kešo je tražio 15 minuta stanku. Stanka do, samo da vidimo, do 13:10, do 13:10 molim.

Povreda Poslovnika Zlatan Begić, samo da kažem evo dok, oprostite samo

ZLATAN BEGIĆ

Odustajem, hvala Vam lijepa.

MARINKO ČAVARA

Hvala.

Znači, stanka do 13:10, molim predsjednike klubova da dođu ovdje za kratke konsultacije, 13:10 molim vas da budete točni, najvjerojatnije ćemo tad i završiti sjednicu.

/PAUZA/

MARINKO ČAVARA

Molim vas da zauzmete mjesta sačekamo samo SDA da nam kažu što su tražili stanku, a mi smo već u načelu postigli neki dogovor.

Nastavićemo s radom, mi smo ovdje u pauzi, u ovoj kratkoj stanci, ovaj, predsjednici klubova malo postigli neki konsenzus oko daljnjeg rada.

Samo ćemo dati riječ gospodinu Keši da obrazloži zahtjev za stanku.

Gospodine Kešo izvolite.

SAFET KEŠO

Hvala uvaženi predsjedavajući.

Probaću u tri rečenice da kažem, imali smo potrebu, naravno, da se konsultujemo i konstatovali smo da smo se, nažalost, našli u jednoj vrlo, vrlo nezahvalnoj situaciji, u situaciji u kojoj su u Parlament uprte oči desetina hiljada ljudi koji čekaju na ostvarenje svojih prava, u to ime ja bih mogao danas, kako kaže kolega Begić, govoriti vjerovatno sat vremena najmanje svako od nas. Želim da izbjegnem tu vrstu rasprava i polemika, želim vrlo jasno kazati da je SDA, Klub SDA danas ponovio, da tako kažem, svoj raniji stav da smo spremni podržati hitnu proceduru, da smo spremni podržati i skraćenu proceduru, da smo spremni podržati i redovnu proceduru, znači sve kako bismo došli do evo budžeta i do rješenja za ove ljude. Molim vas da vi koji ste preuzeli historijsku odgovornost da stvorite minimum uvjeta da se to dogodi, da provjerite našu spremnost za glasanje za ovaj budžet i za ostvarivanje prava, evo, ovih ljudi.

MARINKO ČAVARA

Hvala kolega Kešo.

Ja zaključujem 29. hitnu sjednicu.

Samo ću vam obrazložiti, koliko ja znam svi zastupnici žele da imamo proračun i ovo što ste upravo rekli moramo stvoriti uvjete da ga usvojimo. Ja ću zakazati sjednicu, prvi dan koji može

se održati sjednica to je 15.10. u 12:00 sati biće hitna sjednica za proračun, poslije toga će biti hitna sjednica po zahtjevu pet zastupnika oko evropskog puta BiH, a iza toga bit će redovita sjednica. Molim vas da planirate 15. i 16. listopada da radimo za ove tri sjednice dok ne završimo.

Hvala vam lijepo, sretan put.

Sjednica završena u 13:18 sati.